

2 PETRO

Kukū Nyɔɔfa Ko Di Petro

Lakpana Nii

¹ Kukū ko mmle lekye ami, Simon Petro, Yesu Kristo kpemblate ku tɔkyɛntɛ nfū. Kókpana kū nta aye ba diefe ni di Yaa loo ku Dikite Yesu Kristo ɔsaabla tinini kamɛ, biewe ni ofū onu wɔ niefū ni kɔya fe ole wo.

² Yaa ale ye sibuale, aata ye atoko ɔkye ole niimu kamɛ diekye bitootofo nwɔ ku Saate loo Yesu.

³ Yaa lεyɔ nnwɔɔ omu cɔn osie εɛta wo asaa ya amuu nieffī ni kaaso ka mmle suoto ale buafuo nkpa osie mumbla nwɔ ɔkpɛ. Ɛɛbla nle mmle diekye butootofo nnwɔɔ Yaa wɔ nιɛlɛɛ wo ale buawɛ ni kalekɔ di lɛkpa nɔɔ nwu ku dibiene nɔɔ nwu kamɛ. ⁴ Yaa lafe di osuku wɔ mmle suoto εɛta wo atasaa biene nwu nkpo niefū ni kɔya aabue aate ale abata wo nii, ale buafe di atasaa nwu nkpo suoto muntoso suoto sina akɔnsɔkleesaa kpile ya ninta otii nwɔɔ ni kaayi ka mmle kamɛ, ale buaakple batii ba nimawɛ ni Yaa letembi biene nwu okle.

⁵ Ta nle mmle oso yi, bikpee kɔnyaabe bieyɔ dibiene ɔbla bikyakaa di ofū onu lee suoto. Diibiene nwu nkpo suoto yi, bieyɔ lɛsaatofo bikyakaa. ⁶ Lɛsaatofo suoto yi, biyɔ suoto omufū oklee bikyakaa, di suoto omufū oklee kamɛ yi, bieyɔ otu okpee bikyakaa, di otu okpee kamɛ yi, bieyɔ Yaa lεyɛkɛ bikyakaa. ⁷ Di Yaa

leyekē kame yi, bieyo sibilema obla bokyakaa, di sibilema obla kame yi, bieyo lebōmbō bokyakaa.
8 Atembi ya mmle dikpe ni biewe nε. Nse atoofū kasie kaame lee niimu kame yi, abata ale mimbla ɔkpε nwaa mintika abi biene di obe wō bitootofo ni Saate Yesu Kristo nwu oso. **9** Nse otii owo nnaa letembi le mmle okle yi, ni ate fe otii wō di anu kobia nii, ánfuo asaa ɔnya kaakyonkō, ni atoooyee kafōc alε Yaa ntoofoto nwō siikpile se atoobla eεbafe nii.

10 Babiloo, bikpee konyaabe biefū bikpee bile nwaako Yaa leles ye eediki ye. Ni nse biebla asaa ya mmle yi, ni diidii bilabakple nkpaamaa di ofū onu lee kame. **11** Ni bibawε osuku niimu kame mimbuo Saate loo ku Dikite Yesu Kristo sekā kalekō nwu nkpo ninnaa ni kaloo.

12 Nioso obe lele manyumasa ye selaa se mmle, kuntε nfe biye sī kofokofoko bikel kafōc nwaako ɔlaa nwu nkpo biefū ni osie kanya. **13** Lenya nlε diesieko ale letoonyumasa ye selaa se mmle di obe wō lekple nkpe ni nkpa. **14** Diekye n-ye nlε dilabakle fie kamakpi fe mmle okle di Saate loo Yesu Kristo latōkō mi ni klekle. **15** Kamabla mmle kafuo nii, ale bia kakpimaa nii bibatoonyuma selaa se mmle obe lele.

Buanya Yesu Lekpa Nwu Anu Ku Anu.

16 Selaa se buatōkō ye ni di mmle okle di Saate loo Yesu Kristo makple anwa ni ku osie yi, diele siku se beetū bεete ni kame selaa buadiki buatōkō ye. Awo bamu buanya lekpa nōc fe ɔka anu ku anu. **17** Obe wō di Ote Yaa layɔ dibu aatōc ni, aata lekpa lakpete nwō nii, buawε ninfa. Ninfε seelɔ lakyε Lekpa nōc nwu nkpo

kame siabue ale, "Nnya nwɔ mmle ninle mi Obi bɔmbɔtε nε, oobuo mi anu!" ¹⁸ Awo bamu nianu sεlo se mmle lakyε osi di obe wɔ di awo ku nnwɔɔ buawε ni di kobokote klekle nwu osi.

¹⁹ Nle mmle oso buofū Yaa ɔlaa babuetεtε selaa se baabue baate ni buonu osie kanya nε. Nkpo oso bikpee kɔnyaaabe biɛkyɔɔ selaa nwu nkpo atoko. Diekye kute fε kandie wɔ nikɔkpa ni diitunu kame diɛlaase di obe wɔ kaale masε nii, di kolesetū lewentrebi nwu nkpo kamakpa ni siitu lee kame. ²⁰ Lesaa finle ninwii dikpe ni bietofo ni ninle ale Yaa ɔlaa buetεtε kuonwii nintaka aadiki Yaa ɔlaa wɔ beebeue beεtε ni kasɔ di Kɔkpana Klekle kame ninnwɔɔ omu nɔɔ osie kanya. ²¹ Diekye diidii Yaa ɔlaa obue ɔtε kuonwii ninkye di otii dibiesaa kanya, kafɔɔ Ninwuna Klekle ninfe di batii suoto mambue ɔlaa wɔ niekye ni Yaa nfū.

2

Petro Laka Bafūbanute Di Balaatε Basaatuotε Suoto.

¹ Fe mmle okle di balaatε Yaa ɔlaa babuetεtε ladie ni baatii nwu nkpo kame saa yi, nkpo okle kafɔɔ di balaatε basaatuotε kamadie kaame lee nε. Babafe di kakyɔnkyɔ sisuku suoto manwako selaa kuafūnu asaatu yo nimawako ni kawɔɔ. Babasī bia Saate wɔ niediki ma eekyeko ni sikpile lεma kame. ɔsaabla lεma nwu nkpo mata kawɔɔ kpata nwa ma di suoto. ² Batii kpinwu matikanko nkpa kpile lεma nwu nkpo nkpaamaa. Ta ɔsaabla lεma oso, batii mabue selaakuu di nwaako osuku nwu nkpo suoto. ³ Di onumbεbεe kame balaatε basaatuotε ba mmle

matōkō ye səlaa kuafunu man-yə manwə koto di suoto lee. Yaa ntoolo ma lepoɔ̄ kofokofoko ɛɛtē bia saa. Nioso anu nɔɔ ntika ma di suoto aleccwɔɔsa ma.

⁴ Obe wə di Yaa batōkyente labla ni okpile yi, Yaa ditadiɛ ma ale atanafi ma kootoko. Aapɛ ma lekpo aafuki ma aakpee di ɔtə wə ninnaa ni kaloo dibiɔ̄ diitunu kame, basi ninfa basoko dii le babakanko ma nii. ⁵ Nkpo okle kafɔɔ̄ di Yaa ditanya batii ba niawə ni kaayi nyaami di Noa obe kame ne. Aata kanto lancɔ̄ ntu layii kayi diayɔ̄ batii ba fεe nitatɔɔyεkε nwɔ̄ nii, diediki Noa wə niayie ni lεkya ale batii basis ni nkpa tinini ku batii bamba bakuensī lete aadiki.

⁶ Yaa lalo Sodom ku Gomora sekpoo lepoɔ̄ aawɔɔsa sī fεe ku ɔtə siakple ntɔ̄. Aabla nle mmle ale diale ɔtə onyu ninta batii ba ninɔyεkε nwɔ̄ nii, lesaa le nimawa ma ni di suoto. ⁷ Yaa ladiki Lot wə niale ni tininitɛ, di batii nwu nkpo nkpa kpile osie seekpoo nwu lafeesa nwɔ̄ ni nnɛɛs. ⁸ Asaa kpile lεma ya baatɔɔbla ni di obe wə aasie ma ni kaame aatɔɔnya nya ni fε otii biene, diate diatoobuo nwɔ̄ suoto osie kanya. ⁹ Nle mmle kotuo ale Yaa n-ye mmle okle aadiki ni batii nɔɔ ankyeko ni ɔɔ onyu lεma kame ku mmle okle aamufū bakpileblate ante anta ni lεkankoyi le suoto abananfi ma ni kootoko.

¹⁰ Eεbla letokonanfi le mmle εεta kyenkye batii ba ninsi ni nkpa di suoto sina lεma akɔnsɔkleesaa suoto, monoobu osie wə nikole ni sesaate di suoto lεma bakpee ni lesalesaa kame.

Balaate basaatuotε ba mmle nimbu asaa. Suoto lεma mbuo ma anu, manyεkε selaakuu

obue di Yaa batɔkyɛntɛ suoto. **11** Bia Yaa batɔkyɛntɛ ba ninkpe ni osie ku otumi balenke ni balaate basaatuotɛ ba mmle, diidii bayiyila di Yaa anu babue selaakuu batɔɔ di suoto lɛma. **12** Suoto kame lekpanko di batii ba mmle mbla asaa fɛ lepoo kame babɔkɛɛ ba baakyɔɔ sikū manlo nii. Mambue selaakuu di asaa ya suoto mananu ni kasɔ. Yaa kamawɔɔsa batii ba mmle fɛ mmle okle manwɔɔsa ni lepoo kame babɔkɛɛ.

13 Batɔɔta batii kpיןwu lɛnya dibuo, nioso Yaa mata mma kafɔɔ manya dibuo. Nni nimate ma letota di asaa ya bɛɛbla ni suoto nɛ. Suoto nyɔɔ ma nse bɔɔbla okpile lɛɛkpaka manyɔɔ manyɔɔsa suoto sina lɛma akɔnsɔkleesaa. Batoonkple anunsɔsaa ku lɛkpɔnɔnfɔ nse basi kaamɛ lee boole alesaa, man-yɔɔ manya suoto leyɔɔ di kakyɔnkyɔ sisuku lɛma suoto. **14** Obe lele lɛsɔnɔkppee leyii ma anu pɔ, okpile ɔkɔnsɔ oklee lɛma kafɔɔ dilɔɔyɔɔ. Mankɔnkyɔ batii ba di ofū onu lɛma nnaa ni osie mankpee di okpile kame. Batɔɔbla suoto lɛma kafɔɔ banumbɛbɛɛtɛ. Nioso Yaa lekpaani ntika baatii ba mmle suoto. **15** Batoodie osuku biene nwu bɛɛtɛ, beeyu bɛɛkyɛ bakye di ɔlaa Buetɛtɛ Balam wɔ niale ni Boer obi osuku lalaale nwu suoto. Nwɔ niabɔmbo koto ko abawɛ ni di okpile ɔbla suoto. **16** Nkpo oso Yaa lasi ɔlaa aata Balam di okpile nɔɔ ɔbla suoto di obe wɔ di bɔɔkɛɛ nɔɔ wɔ niatuka nwɔ ni lakakate ko nwɔ ni ku otii selɔ aatii nwɔ ni osuku di abuusaa ya aatɔɔbla ni suoto.

17 Balaate basaatuotɛ ba mmle nte fɛ ntu abiɔ ya di ntu nintaa nii, ee alokonkyɛ ya kɔɔfɛɛfɔ kotuka kunfenko nii. Yaa lelolaa lɛba ɛɛtɛ ma diibio le niekyofo ni kaamɛ lɛwɔfɔ ni tunutunu.

18 Mambue selaakuu mantakatesa suoto katoo, man-yo suoto sina akɔnsɔkleesaa mankyɔnkyɔ batii ba nintoodie ni baakpilete kame ninayikle nii. **19** Batii ba mmle mbue suoto osieko ɔlaa manta mba nintikanko ma nii, kafɔɔ mma bamu basi di kawɔɔ ɔsaabla selanle kame. Diekye nse ɔsaabla owo kolenkee otii owo yi, ni aatookple ɔlanle εεta ɔsaabla nwu nkpo.

20 Nse batii letoso kayi ka mmle asaakuu lema ɔbla di obe wɔ beetofo ni Saate loo ku Dikite Yesu Kristo, fie beekple beesifi ɔsaabla nwu nkpo kame eekple eelenkee ma yi, nkpa be nfe mansie ni nlalaa ninlenkee mbe kame baasie ni saa. **21** Nse batii ba mmle batantofo nkpa tinini osie osuku nwu nkpo yi, se bia dile ma dilenke ale batootofo nwu fie batookple beekple di kufiofa klekle nwu nkpo di Yaa leta ma ni nkpaamaa.

22 ɔsaabla lema wɔ mmle kodiki kuntuo ale kubio akpa ya mmle nte nkpo ale, “Weewee lekple εεkye ɔɔyɔ nnwɔɔ omu nɔɔ alaa anya. Lεplakuo le bikpeesa ni ntu lekple diesifi dielaakpe apatapata.”

3

Yesu Kristo Makple Anwa.

1 Babiloo bɔmbɔtε, kukū ko mmle ninle kɔnyɔɔfa kɔkpana nkyesee ye ni ne. Di akū nwu nkpo anyɔ kame lεyɔ letika di suoto fe onyumasa nle kɔsenkesa ye disibu di asaa biene suoto. **2** Komie nle binyuma selaa se di Yaa ɔlaa babuetete klekle labue baatε ni saa, bienyuma kafɔɔ kufiofa ko di Saate ku Dikite lekpee wo ni diefe ni baatɔkyentε nwu suoto.

³ Lekasale bitofe bilə di ayi yentele ya mmle kame yi, batii ba nimasié ni nkpa di suoto sina akonsokleesaa kpile lema suoto mawa, mamama ye. ⁴ Bababue ale, “Ofe di otii wɔ niebue ale abawa ni nkpe? Diekye dieyɔ ni di obe wɔ baawa loo lekpi nii diebase ni bia mis, mmle okle kaayi nte di Yaa lebla ka ni bia kasɔ kakyeke, nkpo nwu kate ne.” ⁵ Batii ba mmle ɔtɛ bɛete ale bloofū nwaako ɔlaa wɔ mmle banu ale saa, Yaa niadiki kanya ni di osi ku kasɔ ladie ne. Aabla kayi aadiki di ntu kame, ntu kafɔɔ ləmana ka diekyi. ⁶ Ntu nwu kafɔɔ suoto aafe aata ale kayi layii ku ntu, dialo saa batii ne. ⁷ ɔlaa wɔ suoto di Yaa lafe aabla ni osi ku kasɔ, nwunwu εεyɔ akle kayi ka mmle εεte εεta obe wɔ abafie ka ni ku ɔtɔ ne. εεbla nle mmle εεte dii le abakanko ni batii ba ninanyekε nwɔ ni anwɔɔsa ma nii.

⁸ Babiloo bɔmbɔtε, bitanyee lesaa ninwii le mmle ninle ni ale di Saate anu, kase kukanwii diesi di dii ninwii ku alekakpe kame. Diekye di ɔkye nɔɔ, anyɔ nwu nkyεkye. ⁹ Diekye diele ale Yaa ɔbla εεbla nyɔnɔnɔ di ɔlaa wɔ eebue εεte ni suoto ale ɔlɔɔbla fe mmle di batii bawo konyu nii, kafɔɔ otu εεte kaasɔ εεta ye. Diekye oloomie ale otii kuonwii awɔɔ, kafɔɔ omie ale batii bamuu bakyi di sikpile lema suoto.

¹⁰ Kafɔɔ Saate dii nwu nkpo ɔwa dibawa fe yu. Dii nwu nkpo kale, osi kamaye ku kudu osie kanya. Osi ku asaa ninya kamafie ku ɔtɔ fεε. Kasɔ ka mmle ku asaa ya nin-ye ni kafɔɔ kamafie anyε.

¹¹ Obe wɔ di asaa ya mmle amuu kamawɔɔ ni mmle okle, ni baməntii okle dikpe ni biele?

Dikpe ni biesie nkpa klekle biεyεkε Yaa. ¹² Obe wɔ bisi bisoko ni Yaa dii nwu nkpo biokpee kɔnyaabe bile diwa ni wla, dii nwu nkpo di osi asaa kamafie anwɔɔ ne. Difila kamanyanakiiisa osi asaa amuu. ¹³ Kafɔɔ awo busi busoko ɔlaa wɔ di Yaa labue aate nii, ninle ni osi fole nwu ku kasɔ fole nwu, nfū di ɔsaabla tinini kamawε nii.

¹⁴ Nkpo oso babiloo, di obe wɔ bisi bisoko ni dii nwu nkpo yi, bikpee kɔnyaabe ale biate tinini, okpile kuonwii kafɔɔ dilaatika ye di suoto ale atoko ɔkye ole kasie minko Yaa ntεε. ¹⁵ Binyuma bile Saate loo lawε otu ɔte kaasɔ aata ye, diata ale biawε osuku biawε didiki. Obiloo bɔmbɔtε Paulo latɔkɔ ye ɔlaa nwu nkpo okle di obe wɔ aakpana kukū aakyeseε ye ni di ninumbe le di Yaa latɔɔ ni kanya. ¹⁶ Di selaa se mmle suoto yi, ankpana sī di akū nɔɔ amuu kame fe mmle kobue nii. Selaa sewo di Paulo akū kame nkpe osie ku kasɔ onu. Batii ba ninanye ni lesalesaa bεεwa ni kasɔ di ofū onu lεma kame ndiki selaa se mmle kasɔ di osuku bamba suoto, fe mmle mambla ni di akū bamba suoto di Kokpana Klekle kame. Nle mmle obla nta ale manwɔɔ.

¹⁷ Kafɔɔ aye babɔmbɔtε nii, biye nle mmle kofokofoko. Nkpo oso, bilolaa suoto binyu, ale batii kpile ba mmle ɔsaabla dilaakpaa ye dikpee kaalala kame ale biayu ofū onu lee. ¹⁸ Kafɔɔ bimus di Saate Yesu Kristo ku Dikite loo sibualε ku lesaatofo kame. Lele nwɔ ninle dibu, diεyɔ ni nua diesifi ni dinaa ni kaloo. Diwa kaanya!

Yaa Kanya Ninii Fole Selεε

Selεε: Yaa Kanya Ninii Fole Selεε New Testament

copyright © 2008 Wycliffe Bible Translators, Inc.

Language: (Selεε)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source files dated 29 Jan 2022

b86b27c9-33ee-5380-a452-244df2dc60c6